

大正藏第 03 册 No. 0188

异出菩萨本起经 1 卷

No. 188

异出菩萨本起经一卷

西晋居士聂道真译

释迦文佛，前世宿命为人时，在夫娄多摩国，世世为善，无数世乃得为佛。

佛为菩萨时，名摩纳，居山中，衣鹿皮衣。

时入城，城名钵摩诃，王名耆耶。菩萨见城中忽忽，因问道中行者言：「今日城中，何以忽忽？」行人对言：「佛今日当来！」

菩萨闻佛当来到，内独心喜口言：「今日见佛来者，欲从佛求我心中所欲愿者。」

须臾有一女人，名曰俱夷，持应水瓶，有华七枚，华名优钵。

菩萨随而呼之曰：「大姊且止！」俱夷即止待之。菩萨言：「请夫人手中优钵华。」俱夷言：「今日佛当来到，大王在浴室，我当以华上之，华不可得！」菩萨言：「雇华百钱。」俱夷曰：「华不可得！」菩萨曰：「可自更取。」俱夷曰：「不可得！」菩萨复言：「雇华五百钱。」俱夷心自念：「此华纔直两三钱，今乃雇五百钱。」便以优钵华五枚与之，俱夷自留二枚。

菩萨探怀中赍钱，适得五百，尽以与之，各自别去。

俱夷心念言：「此道人，衣鹿皮衣耳，适有五百银钱，尽用雇华，疑此非恒人也。」即随而呼之曰：「男子，男子！且止！」菩萨即止待之。俱夷曰：

「卿以诚告我，我以华与卿；不者，我夺卿华去。」菩萨言：「我买华，从百钱上至五百，何故夺我华？」俱夷曰：「此华王家华，我力势能夺卿。」

菩萨即以诚告之：「我闻佛今日当来到，欲以华上之，从佛求心中所欲愿者。」俱夷曰：「大善！愿我后生，为卿作妇，卿后生好恶者，我为卿作妇，必置我心，令佛知之。」菩萨曰：「可！」便以手中华二枚，与菩萨令上佛。俱夷言：「妇人不能得前，愿以华累卿。」菩萨便受之，各自别去。

须臾佛来到，国王以下至万民，皆以百种杂华，散佛头上，华皆堕地。

菩萨持华五枚，散佛头上，华皆留止，上向成行，如根生不堕地；菩萨持俱夷华，散佛头上，华复留止，上向成行，在两肩不堕地，佛知菩萨至心。

佛言：「令汝得心中所欲愿者，却后九十劫，劫名拔罗，汝当为释迦文佛。」菩萨闻佛语，心中大欢喜，即布发令佛足蹈之，故立于佛前踊跃，佛以神接之，即去地四丈九尺，无所播持，从上来下。

佛复言：「令汝后世得道度世，亦当如我作佛。」

是时佛者先世佛，号曰题愁竭罗佛！

佛般泥洹去，菩萨还入山中，寿终以后，即上生第二忉利天上，诸天皆共护视；天上寿尽，即复来下生鸠夷那竭国，为飞行皇帝，主四天下；寿终即复上生第二忉利天上，作帝释。如是终而复始，凡三十六为天帝释，八万四千世为飞行皇帝。

如是寿终以后，即上生第四兜率天上，即复下生迦维罗卫国。迦维罗卫国者，天地之中央也；佛生者，不可边土余国，地为之倾侧。

迦维罗卫国王，为人仁贤，即下入王夫人腹中，但有不净故，无所附近。

左右群臣，及邻国请可属迦维罗卫国者，闻王夫人有娠，皆来贺大王，前为夫人作礼。

太子从腹中见外人，如蒙罗穀中视见外人；外人作礼，太子于腹中，以手攘之。所以攘之者何？不欲烦扰天下人也。

夫人怀抱太子时，天上诸神，日持天上饭食，来置夫人前，夫人不知饭食所从来？不能复食王家饭食，王家饭食，苦且辛。

太子以四月八日夜半时生，从母右胁生堕地，行七步之中，举足高四寸，足不蹈地，即复举右手言：「天上天下，尊无过我者！」

四天王即来下作礼，抱持太子，置黄金机上，和汤浴形，王与夫人、左右皆惊。

太子生时，上至三十三天下至十六泥犁，傍行八极，万二千天地，皆为大明，天地为之振动，乃下为儿。其乳母，以[迭\*毛]布囊授其母，即亦自乳养，名为悉达。悉达生身，有三十二相。

明日，王与夫人议：「吾子生不与人同，国中有大道人，年百余岁，大工相人，字为阿夷，宁可俱行相太子。」夫人曰：「大善！」

王与夫人，共行到道人所，王以黄金一囊，白银一囊，以上道人，道人不受金银，即开[迭\*毛]布而视之。

太子有三十二相，神光表现，道人即垂泣而悲。

王夫人问：「道人！吾子将有何不善耶？王今日故相太子，欲知善恶，何以故悲泣？」

道人曰：「昨日天地振动，正为太子！我伤年老，今我当去世，恨不待此人，恨不闻是人经戒，以故悲泣。」

王闻道人所言，即为太子，选择国中名倡妓，得四千人，令千人一番歌乐，昼夜不休息。

又欲宿卫太子，王深知道人工相人，王即为太子，更治宫室门户垣墙，皆令完坚，若欲开之，持门户者，其声当闻四十里中。

太子生时，殿中有仓头亦生，有一白马亦生，仓头名车匿，马名曰鞞德，王令仓头侍太子马，为太子养护，当乘骑之。

太子生七日，其母终矣。

太子年十岁，前白大王：「为王太子，未曾出游。」王曰：「大善！」即令左右百官，随太子行游。

太子乘车，出东城门，第二忉利天王释，即化作病疾人在前，腹大身肿，肌肉尽索，着壁而息。

太子问其驭者：「是何等人？」驭者对曰：「是病疾人。」太子曰：「何如为病疾人？」驭者对曰：「是人宿命为恶，今生为人，饮食不节，卧起无常，中得为病。」太子曰：「吾国王之子！饮食不节，卧起无常，当复得是病？」驭者曰：「人皆当得是。」

太子即回车而还，愁忧不乐，念：「天下人悉当病，今我当复病，不复饮食。」

大王悔令太子出游，复闭宫门，不复使出，还作倡妓乐之，太子甫愁忧益剧，不能饮食，至后稍稍差。

复数年所，太子复报大王：「今在宫中闭日久，思乐复一出游。」

大王不忍逆太子意，复可之，豫令国中：「太子当出，勿令病人诸不净洁在道傍。」皆勅令太子复乘车出南城门。

天王释，复化作热病人，头面不理，屎尿相涂，还自卧其上，命在呼吸。

太子问驭者：「是何等人？」驭者对曰：「是人宿命为恶，不肯自克，饮食不节，卧起无常，中得是病，命在须臾。」太子曰：「吾亦饮食不节，卧起无常，当得此病？」驭者曰：「人皆当病。」

太子即复回车而还，太子复愁忧，不肯饮食。大王曰：「傍臣左右，故先勅令国中，勿令病人诸不净洁者当太子，何故令病人见太子？」后为作倡妓乐太子，太子愁不解，不以乐为乐，后稍差。

稍差后，复数年所，太子复报大王：「闭其宫中不乐，复欲出游。」王曰：「汝一出来，还常愁忧不乐，不欲复饮食，何为复出游耶？」太子曰：「我不复尔。」

王复令国中：「太子欲出游，勿令病人诸不净洁当道见。」太子乘车，出西城门。

天王释，复化作一老人，羸瘦背伛，拄杖而行。

太子问驭者：「是何等人？」驭者曰：「是老人。」太子曰：「何如为老人？」驭者曰：「人生地上，从年一至竟，寿命欲尽，气力衰微，饮食不能，故曰老人。」太子曰：「吾亦当复老耶？」驭者曰：「人生皆当老。」太子曰：「回车而还，吾亦不久居世间。」便复大忧：「人皆当复老衰微，饮食消尽，当终亡，我何为久于世间？」不肯复饮食，愁忧低头。

大王复诱恤谏晓：「我独有汝一子耳，当持国付汝，奈何一出，还輒愁忧，不肯饮食。」王大为作乐乐之，后复稍稍解。

如是久久后，复报王：「我欲出游。」王答言：「汝一出来，还輒愁忧不乐，不肯饮食，发瘠瘦，从死还，何为复欲出游？」太子曰：「我年长大当老。」

王复遣出北城门，天王释，复化作丧车，中外男女，持幡啼哭，随车而送之。太子问其驭者：「是何等人声？」驭者曰：「是哭声。」太子曰：「何如为哭声？」驭者曰：「有人死者。」

太子曰：「何如为死？」驭者曰：「人生地上，悬命在天，寿有长短，故曰死；死者无所复知，身体皆消尽，终无有期，家室哀痛，随而送之。」太子曰：「吾亦当死耶？」驭者曰：「人皆当归死。」太子曰：「吾不能久居天地之间，吾当复是死。」遂回车而还。

王问驭者：「太子还何以疾？」左右白言：「太子出游，道见丧车，心为不乐，故还疾。」王曰：「吾亦不欲令太子出游。」

太子年二十，王欲为太子娶妇。太子曰：「我不娶妇。」

王为太子，阅一国中女，得数十万女，令太子目阅视之讫，无有可太子意者，最后一女，名曰俱夷，太子曰：「吾欲娶是女。」王即为太子娶之。

为太子娶妇，是女平生可持华卖与菩萨者，宿命时，字俱夷，今生续字俱夷。

太子谓妇曰：「我两人，同床并首，愿得好华，置我两人间共视，亦好耶？」其妇曰：「华可得。」即取华置中央，夫妻侠之卧。

妇人之意，欲附太子，太子固谓妇言：「若来附我，必迫此华，此华有汁，流污床席。」其妇即自却。

久久复谓妇言：「我两人，同床并首，愿欲得好[迭\*毛]布，置我两人中央顾视之，不亦好耶？」妇曰：「[迭\*毛]布可得。」即取[迭\*毛]布置中央。

妇人之意，意欲身前近太子，太子曰：「若来附我，必有汗垢污[迭\*毛]布。」其妇即却，不敢大亲太子，意疑太子，坐起常随太子。

夜半时，四天王，从天窗中来，呼太子曰：「时到可去。」太子曰：「我欲去，不能得去。」四天王，即令舞歌者伏鞞瞑，无所复知。

其妇卧出，太子徐据床，起视其妇，恐妇觉知，太子遂下床而起得去。

徐呼同日所生仓头车匿，令鞞白马鞞德于中庭。

车匿即鞞马，太子上马欲去，恐门有声故，徘徊中庭，太子马行，蹄声常闻二十里，是门声闻四十里故，太子不敢开门。

四天王，即使诸鬼神，抱持马足，踰屋出城，自到王家佃上，止树下。

明日，王不知太子所在，宫中骚动，王曰：「吾子未曾出游，今且在佃舍耳。」

王即自到佃舍，遥见太子坐树下，日光欲照太子，树曲其枝叶扇之，不得令日光照太子。

王恐心且惶，下马为太子作礼，太子亦为王作礼，太子曰：「我为王作子，未曾出游，今一出游，今王复追我，我马与奴，续在一傍，愿大王归宫，我数日自归。」

王即上马而归，谓其妇俱夷：「太子今在佃上，数日来归。」

太子在树下，专精长思惟累劫之事，上至三十三天，下至十六泥犁，无一可者；见田中犁者，出土中虫，或有伤者，或有死者，鸟复随而食之，太子叹曰：「人生地上，死当入泥犁，不亦苦乎！吾不能久居世间。」即上马而去。

行十数里，见一男子，名曰贲识，贲识者，鬼神中大神，为人刚愎；左手持弓，右手持箭，腰带利剑，当道而立。

贲识所立处者有三道，一者天道，二者人道，三者泥犁恶人之道。

太子遥见，心为不乐，直以马前趣之。

贲识即惶怖战栗，解剑持弓箭，却路而立。太子问曰：「何道可从？」贲识即以天道示之：「此道可从。」

太子行数十里，道逢猎者，太子曰：「我欲从卿有所债，宁可得耶？」猎者言：「所索者可得。」太子曰：「欲得君鹿皮。」猎者即以皮与太子，太子亦以珍物与之。

太子行数十里，驻马而下，谓车匿：「若从是而还。」车匿言：「我随大天，不可还。」太子曰：「归谢大王及我舍妻，言我欲入山为道，终身不复还。」

太子取头上宝冠无利着身珍衣，授与车匿，车匿啼哭受之；其白马，前屈膝垂泪，而舐太子足。

车匿步牵马而还，车匿亦啼，白马亦啼，从后望太子，取麀鹿皮着之，欲变其服。

妇日望太子当归，反见空马，啼哭自投殿下，前抱马颈，谓车匿：「太子所在？」车匿曰：「太子上谢大王及我舍妻，言我入山为道，终身不复还。」

俱夷曰：「我何薄命！如亡我夫，我当于何所求？我夫我夫！在天上地下人间耶？我当行求之！」谓白马言：「太子与汝俱出，若反空还？」左右皆为感动。

王闻太子去，泣下交横，谓俱夷：「人生地上，皆当归死，吾子学道度世，不亦善耶！」欲以解俱夷意，王亦念太子无已。

王即请国中贤智之士，得数千人，王复选数千人，得数百人，复于数百人中，得数十人，复于数十人中，选择得五人。

王呼五人问言：「卿等日夜于家，抱子持孙，亦独乐乎？今吾有一子，未曾出游，不知天下白黑，一旦舍吾，远处行入名山，涉历窈林，趣度溪谷，寒暑饥渴，谁当知之？或有虎狼猛兽吉凶之事，谁当见者？今卿等五人，各遣一子，追求吾子，得者便随侍之，吾子终身不复还，卿等五人，有中道舍吾子去之，吾灭卿等家族。」五人即遣。

五子追求太子，得之于名山，随而侍之。

如是数岁，太子亦不问五人所从来，太子所行者，皆窈林之处，五人患而苦之，自相谓言：「是王太子，不行学道，病狂痴耳，行不择道，我五人不能随，还者王灭吾家，不如于此而止。」五人皆言：「可！」

五人所止处者，大水上，其水上有果蓏异类之物，冬夏常有所噉故不饥，五人止留，太子亦不问也。

太子遂入深山无人之处，取地高草，于树下正坐，一心自念言：「今日肌骨筋髓，皆枯腐，于此不得佛不起。」

太子便得一禅，复得二禅，复得三禅，复得四禅。

便于一夜中，得阿术阁，自知所从何生，无数世时宿命。

二夜时，得第二术阁，得天眼，彻视洞见无极，知人生死所行，趣善恶之道。

向明时，便得佛。

佛自念：「我以得佛矣！难得难知难了。」

得佛道，便到龙水所，龙名文邻。

文邻者所止水边有树，佛便正坐自念言：「昔往无数劫时，有题和竭罗佛言，我当为释迦文佛，我今日已得佛矣！我从无数劫以来求佛，适今得佛耳！我从无数劫以来所施，为入六波罗蜜，不忘我功德也，今皆得之。」

佛适念是，便入禅波罗蜜。

佛在水边树下，坐禅光景入水，彻照龙所居处。龙见佛光，大惊，毛甲为竖。

文邻龙曾已更见三佛，一者名拘娄孙佛，二者名拘那含牟尼佛，三者名迦叶佛，皆在树下坐，光景皆入水中，彻照龙所居处。

龙见佛光景如前，三佛光景世间得，无复有佛。

龙便大喜，出水左右顾视，见佛坐树下，身有三十二相，正金色，端正如日月。佛三十二相，遥见如树有华。

文邻龙便前趣佛，绕佛七匝，龙有七头，便以覆佛上。龙出水侍佛，便风雨七日，佛禅七日，不动不摇，不喘不息，佛意快无极，过七日后，风雨便止。

佛用初得道故，欢喜不食七日，龙见佛欢喜，侍佛亦不食七日。

七日竟，佛自觉，龙便以作年少婆罗门，长跪叉手，问佛言：「得无寒，得无热，得无为虫蛾蚊虻所娆？」佛报言：「经说言：『人在屏处快』，昔者所闻，今我皆以，更见之是快；居世间不为人所娆亦快；不娆世间人，及蝇飞蠕动之类亦快；过度，不复作世间人、不复作天亦快；无有瞋恚淫泆亦快；于世间得佛泥洹之道亦快。」

龙白佛言：「从今以去，我自归佛，自归经。」

佛语龙言：「比后当有众阿罗汉、比丘僧，汝亦当复务自归之。」

畜生中，文邻为于前自归佛，佛神通洞达，诸天集会，皆稽首前谒。

佛闲居实处，精念：「天下众善悼哀万民，意欲教之，当先教谁？吾王遣五人侍我，五人不能及我，今在水上，吾当先教之。」佛即复故道而还。

五人遥见佛来，不知何人，自相谓：「是人来者，慎无作礼，慎无与语。」五人皆言：「可！」佛遥闻五人所道者。

佛至，五人皆惶怖，前为佛作礼。佛言：「卿等五人，何故无坚心耶？属自相谓：『是人来者，慎无作礼』，今何故作礼？」五人不敢复语。

佛将五人俱去，行数日，佛以手摩五人头须，皆为沙门。

有三道人，各教授弟子，一道人教五百弟子；一道人者，教三百弟子；一道人者，教二百弟子，凡为千人。

佛将五沙门，到三道人所，诸弟子，皆大喜，皆随佛而去。

佛将诸弟子，行至诸国，到城门，钟鼓自作声，琴瑟自鸣；病者得愈，老更少，盲者得视，聋者得听，伛者得伸，跛者得行；百兽相和悲鸣；诸天飞来散花，作乐其上。

佛光照无数天，其领三千日月，万二千天地，皆属焉。

前后教授弟子，教数千万亿人，皆得道度世。

## 异出菩萨本起经

---

【经文信息】大正藏第 03 册 No. 0188 异出菩萨本起经

【版本记录】CBETA 电子佛典 Rev. 1.11 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，CBETA 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---